



UKA 2018/175

25. oktober 2018

Bentiaraq Ottosen

**Nuup Sisimiut Ilulissat Qaqortullu avataatigut illoqarfiit mikinerit aningaasarsiornikkut ineriartornissaat pillugu, kommunit suleqatigalugit, pilersaarusiortoqarnissaa suliareqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarusiaq kingusinnerpaamik UPA 2020-mi Inatsisartunut saqqummiunneqassaaq.**

(Inatsisartunut ilaasortaq Anders Olsen, Siumut)

Siunnersuut Anders Olsen, Siumut saqqummiussaanut Atassummiit qujavugut.

Politikkikkut inuiaqatigiinni neriorsuutigiuarsimasat suli piviusunngortinneqarsimangitsut pillugit siunnersuummi matumani pineqartumi Atassummiit imatut Oqaaseqarfigissavarput:

Nunatsinni ukiorpassuannortuni inuiaqatigiinni politikkikkut suli piviusunngortinneqarsimangitsut piviusunngortinnissaat pillugit Atassut suleqataanissaminut piareersimavoq. Piffissanngorsimavormi ineriartortitsinermi timitaliinissaq nunatsinni pissusissamisoortoq atussallugu, aamma nunap immikkoortuini illoqarfiit mikinerusut akornanni inuussutissarsiutitigut ineriartortitsinikkut periarfissat aallunnerisigut nutaamik eqqarsarluta timitaliinissatsinnut.

Nunatta inuussutissarsiutitut pingaarnersaat aalisarnerup saniatigut, ukiorpassuarni aningaasarsiornitta ataavartumik nunami pilersitsiviunissaa Atassut-ip pingaartitaraa ersersittuassallugulu, nalunnngilarpummi aalisarneq ukiuni makkunani kingumut qaffakkiartoqqittoq tamanna atorluassavarput imminut pilersornissatsinnik iluaqutaasussaammat.

Ukiuni makkunani unammilligassaqarpugut, kommunit inukilliartortut immikkut ittumik iliuuseqarfigisariaqarpavut. Sumiikkaluaraangatta suliffissanik ugartuiuarpuq, tamanna akiorniagassatta annerpaartaraat suliffinnik nutaanik pilersitsinikkut.



Inuit akornanni ajornakusoorsimavoq ineriartortitsinermi piffiit ilaasa katataavallaarsimanerat pissutaalluni. Isumaqarpugulli tamanna siunissami naleqqussaaneq ineriartortitsineramik aallaaviusariaqartoq, soorlu pisuussutit uummaatsut atorlugit (Aatsitassarsiornikkut), inuussutissarsiutitigut ineriartortitsinikkut (Aalisarneq, Piniarneq, Nunalerineq, Uumasuuteqarnerlu) atorluarnerisigut. Suliffissaqartitsisinnaasut tamaasa atorlugit pilersarusiornikkut siunissami ungasinnerusumi aningaasaliissuteqarnikkut ineriartortitsisariaqarpugut.

Pinngortitap mingutsitsinngitsumillu tunniussinnaasai atorluarneqartariaqarpugut, ukiuni kingullerni erngup nukingata siunissamilu annertuumik nukissiutigineqarnissaa eqqartortarsimavarput. Aamma sermip erngullu tunisassiarinissaanut ulluni kingullerni soorlu eqqartuisimasugut tamakku tamaasa aningaasarsiorfigisinnaasagut ineriartortittariaqarpagut.

Nunattami namminiilivinnissaanut aqummut aningaasarsiornittalu pitsanngoriarterujussuarnissaanut qanillisaataassasoq Atassummiit isumaqarpugut, tamannalu politikikkut pikkoriffigineqarnerusariaqarnera inatsisartunut kaammattuutigeqqiinnassavarput.

Nunami isorartuumi immami nunamilu pisuussutinik ulikkaarpugut, isumatusaartumilli isumaqatigiissinnaaneq annerpaaq atorlugu politikikkut aqutissiuussisinnaaneq pikkoriffiginerusariaqarpugut, innuttaasut politikkerillu kissaaterpassuinit akissaqassagutta.

Illoqarfiit anginerit sisamat ineriartortinneqarnissaanut siunniussaqaarsimaneq imminek ajortuunngilaq, taamaattorli pisariaqarluinnarpoq, illoqarfinni nunaqarfinnilu nussorneq akueriinnarnagu, Atassut-ip oqariartuutigisai piffinni assigiinngitsuni nalilersorneqartuartaqartut. Illoqarfinni anginerni illutaarniaraanni Realkredit-i atorlugu illoqarfinni mikinerusuniittuni atorsinnaanngilaq. Naligiimmik ineriartortitsisoqarnissaanik politikikkut oqartaraanni, tamanna imminut ataqatigiinngilaq naleqqussaaffigineqarnissaalu Atassut-miit inatsisartunut kaammattuugiinnassavarput

Kommunerujussuit 2008-imi pilersinneqarmata Atassummiit akuerseqataanikuuvugut, inuiaqatigiit neriulluarsimaqaat, suliffissuit, sanaartornikkut ingerlatsinerit, namminersortutut ingerlatsinerit, suut tamarmik inuiaqatigiinni neriorsuutaasimasut ullumikkut killiffitta takutippaat qanoq inissisimatinneraatigut. Taamaattumik imminut pilersornermik kinguneqartitsissagutta inuussutissarsiutit suulluuniit salliuttariaqarpagut, qanormi taava isilluta aningaasanik kaaviaartitsinerulissaagut?



Avataaniit aningaasaliisussarsiornikkut periarfissat isumaqarpugut Atassummiit ammaffigisariaqarigut, aningaasarsiornikkut ilorraap tungaanut aallarnissaq isumatusaartumik Atassummiit suleqatiserinnilluta kaammattuutigissavarput pingaarnersiunitsinni ineriartortitassat sukkulluuniit atorluartariaqarigut, uanimi aningaasanik kaaviaartitsinerulernermik kinguneqartumik namminersortutut inuussutissarsiuteqartut uukkatarineqarnissaa anguneqarsinnaammata.

Qulaani oqariatuugisagut innersuussutigalugit, siunnersuuteqartup tunngavilersuutai ernummateqarneralu Atassut-mi paasilluarpagut, taamaattumillu illoqarfiit nunaqarfiillu aningaasarsiornikkut suliffissatigullu periarfissaasa annertusartuarneqarnissaanut inuussutissarsiortut suliffissanillu nutaanik aallartitserusuttut pilersaarusiogatigilluarneqartarnissaat Atassut-miit sunniuteqarfigeqqinnissaanut piumassuseqarpugut.

Taamatut oqaaseqarluta Atassut-miit siunnersuuteqartoq Anders Olsen Siumut qujaffigalugu ilalerparput. Atassut-miit neriuutigaarput naalisaalluta saqqummiussaqaarnerput, Naalakkersuisuni kommuunet inuussutissarsiortullu pilersaarusiornissamik saqqummiussaqaarumaarnissaat iluatsilluarumaartoq.

Atassut-ip taamatut oqaaseqarluni ataatsimiititaliamut susassaartumut ingerlateqqinneqarnissaa taperserpaa.